

Jiisusi uanga ernerera

(angutitut)

Jiisusip ataataa:

Ukioq 23-mi inunngorpunga. Soorunami Kristusip inunngornera sioqqullugu ilaa.

Taanna pisoq taannaqalimi qalipanneqalerpoq kinguaariinniit kinguaariinnut eqqumiitsuliortorpassuit qalipaapput.

Taakkunani takussaasarput nukappiaraq, arnaa uangalu nersutit inaanniittugut, avatagiisigalugit ivikkat panertitat, nersussuaq, siutitooq, kunngillu pingasut.

Arnaa uliguaarpoq tungujortumik qaqortortalimmik inngianangajattumik. Uangalu tunuatungaaniippunga nikorfalluataarpunga, sukannerpalulaartumik isikkoqarlunga, utoqqartut 80 missaannik ukioqartutut isikkoqarpunga.

Tamakku "eqqumiitsuliortut" susunukua? Qanoruku ittut? Eqqarsaataat sumiippat?

Uanga taamanikkut 20-it sinnilaaginnarlugit ukioqarpunga, arnaa 19-inik ukioqarluni. Meeraavugut!

Taamani qanoq isikkoqarnera nalunngilara. Sooruna utoqqarsuartut isikkoqartikkusuttaraannga?

Soortoq?

Inuuttaruttortutut piumassuseqarluartutullu isikkoqartuuguma taava anaanaata nivarsiaanera – suli attorneqarsimannginnera – upperineqarsimassanngikkaluarmat!